

Saivs, punts da lain, pumers e tetgs da schlondas

Conceda il cussegl dals chantuns puspè 50 milliuns per la cuntrada?

DA CLAUDIA CADRUVI / ANR

■ «Tgi pomai ha daners per sanar mirs sitgs?» questa dumonda fa Georg Ragaz da l'uffizi grischun per la tgira da la cuntrada. Ma el sez ha vis co ch'ins ha pudì sanar mirs sitgs ch'eran ids en decadenza ils ultims decennis. En las vischnancas da l'Engiadina bassa u en la Val Poschiavo n'avess ins betg gi avunda daners per restaurar ils mirs sitgs ch'èn ina veglia furma da l'agricultura. Ma entras il Fond svizzer da la cuntrada è stà pussaivel, raquinta Ragaz. Ed uschia èi i era cun 600 auters projects en Svizra che fissan uschiglio restads be siemis.

Il cussegl nazional decida cun il cor

Pli che mo cler è il resultat stà en il cussegl nazional durant la davosa sessiun. Cun 130 cunter 32 vuschs ha la chombra gronda decidì da puspè emplenir il Fond svizzer da la cuntrada. Sch'il cussegl dals chantuns dat medemamain glisch verda datti danovamain 50 milliuns francs per cuntinuar durant diesch onns la lavur.

Il 1991 aveva il parlament avert quest fond a chaschun da l'onn giubilar. L'onn 2001 èn las finanzas dal fond dentant duvradas si ed il fil ch'ins ha cumenzà a filar vegniss interrut. Ils cussegliers nazionals han tadlà sin il cor e na sin il cussegl federal. Lez aveva numnadamain proponi da betg pli emplenir il fond per spargnar. Il bun resultat da la sessiun passada lascha sperar ch'era

il cussegl dals chantuns vegn ad approvar ils 50 milliuns per ils onns 2001 enfin 2011.

Ina benedicziun per mintga vallada grischuna

Radund 7 milliuns francs dal fond giubilar èn vegnids en il Grischun per realisar radund 30 projects, di Ragaz. I sa tracta da trais projects pli gronds e da chaussas pitschnas. Tar ils gronds tutgan: Ils mirs sitgs a Poschiavo ed en l'Engiadina bassa, la cultivaziun dals prads maghers en Tumleasta e lavurs vi da saivs vi vas a Trimmis.

Summas pli pitschnas ha il fond dà p. ex a Ftan: Là han ins puspè refatg las saivs veglias da lain. A Trin hai dà daners per tgirar ils pumers, a Vrin han ins sustegnì la chascharia da l'alp da chauras. Era per la cultivaziun da graun è il fond s'engaschà en l'Engiadina ed en Surmeir. Ragaz di che l'iniziativa stoppia vegnir dals vitgs e da las vischnancas e ch'i dovria là ina structura che sustegnia ils projects. Ils purtaders en ils vitgs garanteschon uschia ina cuntinuitad da quai ch'ins ha cumenzà, p. ex. che las saivs u ils mirs vegnan era suenter tgirads e mantegnids vinavant.

La pratica, na la teoria

Quasi tut ils projects grischuns n'avess ins betg pudì realisar senza il fond. Da quai è *Diego Giovanoli* persvadì. El è tgirader da monuments e lavura en las gruppas dal fond che decidan tge projects che vegnan sustegnids. Criteris da selezziun sajan: Il project stoppia avair da far cun la

cuntrada (champs, plantas, gauds, auas) en ses context istoric da la cultivaziun e dal niz. Pli-navant stoppian quai esser propostas da lavurs praticas: Retschertgas scientificas, u publicaziuns na vegnian betg sustegnidas, di Giovanoli.

Ils daners dattan in impuls

Il fond investeschia en in champ, nua ch'i na dettia naginas subvenziuns. Senza fond avessan ils iniziants en ils vitgs bleras giadas be duas pussaivladads: Far tut la lavur gratuita u (sche quai nun è pussaivel) gnanca cumenzar in project, di Giovanoli. Sch'il fond surpiglia dentant ina part dals custs, alura sa midian las perspectives da blers iniziants.

In interessant effect descriva era *Hans Weiss* che lavura a Berna tar il fondo. Ins haia fatg persenn che, sch'il fond investeschia insannua, alura vegnian era savens anc auters (privats, instituziuns u firmas) sin l'idea da contribuir ina summa per in project. L'engaschi dal fondo signalisescha uschia als vischins en ils vitgs e regiuns ch'i vala la paina da mantegnair ina veglia punt da lain u da revitalisar in ual.

Era birolists èn responsabels

Giovanoli e Weiss fan omdas attent sin la midada dals ultims onns: a Soglio devi avant 50 onns anc 60 purs che tgiravan la cuntrada. Oz sajan quai be sis. E quels sis na possian betg far tut las lavurs che vegnivan fatgas pli baud. «Era quels che lavuran oz en ils biros ston surpigliar responsabladad per la cuntrada», di Giovanoli. E Weiss exprima: I n'haja nagin senn che nus gijan en vacanzas en pajais esters ed admiraian be là la cuntrada. Nus stoppian era esser conscients da la valur da nossa cuntrada e procurar ch'ella daventia bella.

Pervi da quests motifs è Weiss da l'opiniun ch'i saja giustifitgà d'emplenir danovamain il fond. Ils 50 milliuns francs chaschunian investiziuns da radund 150 milliuns en ils differents projects da cuntrada, calculescha Weiss. Dad ina vart saja quai bler e daners che vegnian investids efficientamain, ma cumpareglia cun autras expensas dal stadi sajan quests 50 milliuns francs per diesch onns anc adina ina cagna.



A Trin hai dà daners per tgirar ils pumers.